

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 3/2010-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffisassaattut siunnersuut, kaammattuutit aalajangersagaq imatut oqaasertaqarpoq: Nunat Avannarliit Killiit Siunnersuisoqatigiiffiata Savalimmiuni naalakkersuisunut, Namminersorlutik Oqartussanut Islandimilu naalakkersuisunut siunnersuuteqarpoq Nunani Avannarlerni Killerni timmisartunik umiarsuarnillu angallannermi attaveqaatit pitsanngorsarnissaannut siunnersuusiortussamik suleqatigiissitaliamik pilersitsisoqassasoq, Nunat Avannarliit Atlantikumi Suleqatigiiffiat (NORA) sapinngisamik peqataatillugu.
(Inatsisartut siulittaasuut, Josef Motzfeldt)

Akissuteqaat

(Ineqarnermut, Attaveqarnermut Angallannermullu Naalakkersuisoq)
Siullermeerinnineq

Nunatsinnut Nunatsinniillu timmisartumik umiarsuarmillu angallanneq siunissami qanoq ilusiligaassava? Atuisartut qanoq iluseqartitserusuppat? Inuiaqatigiittut ilusiliineq qanoq ittoq atorfissaqartillugulu akissaqartipparput?

Ilaatigut apeqqutit tamakku pissutigalugit Naalakkersuisut assartuussineq pillugu isumalioqatigiissitamik pilersitsipput, nunallu immikkoortuini ineriartortitsinissamat periusissat pillugit suliaqarnermik aallartitsillutik. Allatut oqaatigalugu nunatsinni innuttaasut timmisartumik umiarsuarmillu angallannermut tunngatillugu pitsaanerpaamik atugassaqartinneqarnissaasa qularnaarneqarnissaat siunertaralugu Nunatsinni annertuumik qulaajaasoqalereerpoq.

Nunani avannarlerni killerni suleqatigiissitat qulaajaalluni suliaqarneq taanna tapersersinnaassavaat ilaatigut savalimmiuni Islandimilu misilittakkanik ullumikkullu timmisartumik umiarsuarmillu angallasseriaatsimut tunngatillugu nutaamik eqqarsarnermik tapersiillutik. Taamatuttaaq suleqatigiissitaliaq Tunumut pilersuineramik misissueqissaarnermut Nunat Avannarliit Killiit Siunnersuisoqatigiiffiata 2010-mi ukiakkut kaammattuutit aalajangersagaanik (imm. 78) malitseqartitsinertut, Ineqarnermut, Attaveqarnermut Angallannermullu Naalakkersuisoqarfimmit suliarineqartussamat atatillugu iluaqutaasinnaavoq.

Assartuussineq pillugu isumalioqatigiissitap isumaliutissiissutaanut tunngatillugu Ineqarnermut, Attaveqarnermut Angallannermullu Naalakkersuisoqarfik 2011-mi arlalinnik malitseqartitsilluni suliaqartussaavoq taamaattumillu suliniutinik aallartitsisussatut inissisimanissamat isumalluuteqarani, kisiannili suleqatigiissitaliami peqataakutsoorsinnaalluni.

Taamaattumik suliniuteqartunit suleqatigiissitaliamut siunnersuuteqartoqarnissaa Naalakkersuisut qilanaaraat.